

1. Mizoram hmun hrang hranga Sawhthing tam enkawl tura beihpui thlakna Operation Ginger - Fehchhuah runpui chu Aizawla Horticulture Office kawt atangin Horticulture Minister Prof. Lalnilawman tukin khan a vailiam.
2. Lawngtlai Dist tlawha zin, Home Minister Pu K.Sapdanga chuan Third India Reserve Battallon hmunpui Thingkah a mi a tlawh.
3. Election Commission of India chuan September ni 18 atanga October ni 1 chhungin Haryana leh Jammu and Kashmir Assembly inthlan a buatsaih dawn.
4. Indian Space Research Organisation (ISRO) chuan vawiinah khawvel hel tur satellite chu SSLV-D3 hmangin an kapchhuak.

<><><>

#### HORTICULTURE

Horticulture Minister Prof. Lalnilawman tukin khan Mizoram hmun hrang hranga Sawhthing tam enkawl tura beihpui thlakna Operation Ginger - Fehchhuah runpui chu Aizawla Horticulture Office kawt atangin a vailiam.

Pu Lalnilawma chuan Sawhthing tam report an dawn te chu an theih ang angin an bawhzui tih a sawi a, inzirtirna te pawh pek tawh ni mah se tunah chuan nasa leh zual zawka tih a ni dawn ta nia sawiin, sorkarin thlai a thlan chhuah bik - Sawhthing, Aieng leh Hmarcha te chu Horticulture Department lam chan a nih avangin an mawhphurhna pawh an nei sang tih a sawi bawk.

Minister chuan kum dang zawng aiin kumin hian Mizoramah Sawhthing ching an tam tih sawin, kuminah hian Mizoram hian Sawhthing hi quintal nuai 10 chuang thar chhuah theih an beisei a ti a, hetihlai hian a thar chhuah hmian enkawl a ngai tih sawiin, kuthnathawk tute tan Department leh Sorkar thuneitute chu engtik lai pawha biak leh koh theih an ni tih a sawi bawk a ni.

District pali - Aizawl, Serchhip, Hnahthial leh Saituala feh chhuak turte tukin khan Aizawl atangin an chhuak a, hetih rual hian District dangah pawh feh chhuah runpui hi mahni district theuhah an lo tan ve bawk a ni.

Horticulture Department hotute sawi danin Mizorama khaw 263 ah sawhthing a tam a, sawhthing chhingu chhungkaw 6586 te sawhthing a tam tawh a ni. Lunglei district – ah Operation Ginger bul tanna hi Tawipui North – I leh Tawipui North – II ah te neih a ni a, Lunglei South bialtu MLA Pu Lalramliana chuan a hmanpui.

Pu Lalramliana chuan Ginger Operation chu vanduai thila buatsaih mah ni se, Mizoram sawrkarah kut hna thawktute'n beiseina an nghat tih hriain sawrkar pawhin theih tawpin kut hna thawktute hmakhua a ngaihtuah thu a sawi a, kut hna thawktute chu sawrkarin a ngaihthah dawn lo, a ni a ti. Operation Ginger bul tanna pual hian Lunglei District huam chhunga Tawipui North-I leh Tawipui North-II khuaa sawhthing ching chhungkaw 136 te hnenah training pek nghal a ni. Lunglei District ah hian khaw 69 a chhungkaw 2,431 te'n quintal 10,450 aia tlem lo an ching nia chhut a ni.

Serchhip district ah pawh Operation Ginger hi tan niin, vawiin khan Operation team te chuan Neihloh khaw ram chhunga Tuitam Zaua sawhthing hmun kalchilh in kuthnathawktute hnenah Sawhthing tam leh natna avanga an harsatna tawh mek lak atanga inven dan leh enkawl dan zirtirna an pe. Operation Ginger – Fehchhuah Runpui hi Serchhip District puma khaw awm zawng zawng ah neih a ni dawn a ni.

Operation Ginger hi Champhai district ah pawh vawiin khan hman a ni a, Champhai North Bialtu MLA Pu H. Ginzalala chuan Horticulture Deputy Director Dr. Vanlaldiki ziah sawhthing natna, a bawmtu rannung leh a enkawl dan tih lehkhabu a tlangzarh nghal a ni. Siaha Bawrsap Pu VL Hruaizela Khiangte chuan sawhthing tam buaipui tur leh a natna enkawl dan zirtirna fehchhuah runpui Operation Ginger team te chu tukin khan a pisa kawt atangin a vailiam a. Siaha District Horticulture Officer leh staff-te chuan Noaotlah-I leh II ah Sawhthing natna enkawl dan leh enkawl zui zel dan

tur zirtirin pe in Siaha district tuam chhuak turin tunthla chhungin an fehchhuak dawn a ni.

District dangte rualin Operation Ginger – Fehchhuah Runpui hi Khawzawl Deputy Commissioner Pu K. Vanlalthiana chuan District Horticulture Office kawt atangin a vailiam a, Dr. H. Vanlaldiki, Deputy Director, Horticulture ziah lehkhabu a tlangzarh nghal bawk.

Khawzawl DC chuan sawhthing tam nasat avanga Horticulture department hmalakna chu tha a tih thu sawiin an hmalakna ah hlawhtling ngei turin duhsakna a hlan a ni. Operation Ginger - Fehchhuah Runpui ah hian Horticulture a thawkten August thla chhungin District tin tuamin sawhthing chhingtu te zirtirna pe in an feh chhuak dawn a ni.

<><><>

#### **HOME MINISTER**

Home Minister Pu K.Sapdanga chuan Lawngtlai a hmun thenkhat a tlawh hnu ah Third India Reserve Battallon hmunpui Thingkah a mi a tlawh a. UD & PA Minister hian tukin khan Lawngtlai Electric Veng a leitlakhniam thinna lai a tlawh a, khawtlang hruaitute leh Official ten helai bawra harsatna thlenthin dan te Minister hi hrilhfiahin, Minister chuan a theih anga lo enzui a tum thu a sawi.

Kaladan Multi Modal Transit Transport Project kawngpui pawh tlawhin, National Highway 54 laihna leivung vanga KMMTTP kawngin a tawrh nasatdan PWD hotuten an hrilh a, Chanchinbumite zawhna chhangin Pu K.Sapdanga chuan kawng pakhat laih avanga kawng dangin a chhiatphah chuan kawng sialtu hnuhnungzawk, NHIDCL ten dan zawm famkimloh an nei a nih a rinawm tih sawiin, KMMTTP kawngpui chunglam a National Highway zauhna thawktu NHIDCL hotute chu thilawmdan lo sawipui a tum thu a sawi.

Thingkah a Third India Reserve Battalion hmunpui ah hian Home Minister hioan thusawiin Police tan inzirna leh inchherchhuahna tan a tha a tih thu sawiin, Battalion a awmte chuan Thingkah a an awm chu hnual phah nana hmang lovin, midang tan awmve chakna tura an hmunpui chu siamturin a chah a ni Home Minister chuan 3rd IR Battalion ah mi 408 an awm tih sawiin Post ruak 510 lai a awm chu veitham a tling tih a sawi a, a awmsa zingah mi 104 lai mai hmundanga dah an ni chu a hriatthiamloh thu a sawi a, Sorkar chuan Police hnaruaik 300 hnawhkhaturin ruahmanna thuitak a kalpui mek a ti.

Home Minister chuan Third India Reserve Battalion ten an mamawh hrang hrang an thlente chu a theih anga lo ngaihtuah a tum thu a sawi bawk.

<><><>

#### **SENA MEDAL**

India sipai huaisen chawimawina tangkapui, Sena Medal chu Maj Laldingngheta hlan a ni. Aizawl Bungkawn Vengthar mi Maj Laldingngehta leh a kaihhruai Combat Action Team te hian nikum Oct ni 21 tlai lam dar 3 velah Intelligence report an dawn chu bawhzuiin Line of Control rawn kan mek terrorist 4 an hmu a. Terrorist rawn kal na tur ah ruang chaicheh thlak turin Ambush an lo siam a. Inkap in He inkahna ah hian Maj Laldingngheta hian terrorist pahnih a kaphlum a, a hliam te a nat tham deuh avangin rang takin a dam that thleng enkawl a ni. He operation a huaisen tak leh a team te himna tur a ngaihtuah avang te, Pakistan atanga terrorist rawn lut tur alo dan avang te leh terrorist pahnih lai a kahlum avangin India sawrkar chuan India sipai huaisen chawimawina tangkapui, Sena Medal (Gallantry) hi India Independence Day vawi 78 na ah a hlan ta ani.

<><><>

#### **IMA**

Indian Medical Association, Mizoram State Branch chuan Kolkata R.G.Kar Medical College & Hospitala Post Graduate zirlai hmeichhia rawng taka pawngsual leh thah a nih duh loh lantir nana, naktuk zing dar 6 atanga Aug ni 18 zing dar 6 chhung rampum huapin medical service zawng zawng emergency tiam loha nawrh an huaihawt tur chu an thlawp dawn tih a sawi a, Hemi hun chhung hian Mizoram a Hospital sorkar, private leh Mission Hospital zawng zawngah Emergency services chauh hawn a ni dawn a, OPD ah Doctor tumah an thut dawnloh thu thuchhuah ah hian an tarlang.

<><><>

## **SIAHA CHAMBER OF COMMERCE**

Siaha District Chamber of Commerce chuan Trade License Fee MADC in a siamthar chu a sang lutuk a, an duhlo tih a sawi a ni. Vawiin khan Siaha Press Club ah, Siaha District Chamber Of Commerce President Pu Lalchhuanawma hova neih a ni a, Siaha District Sumdawng inzawmkhawm Pawl chuan Trade license Fee tihsan chungchang ah vawi tam MADC lam an dawr tawh thu sawiin, a sawt loh avanga hetiang thil hi ti an nih thu an sawi a, District dang ten kum 10 chuang revised lova an hman laia Siaha District in kum 5 dana a rate an revised chu hunlo in reilo an ti hle bawk tih an sawi ani.

Siaha District Trade license fee hi District dangte ngaituah in rate a sang fal an ti hle a, chutihlai in Trade License Revise hi an duh lo ngawr ngawr ni lovin, rate hlui atanga thlir let a, zaa 30 thlenga tihpun chu an lo rel lawk ve laiin zaa zaa chuang lai a tihsan ani chu an duh lo hle ani.

Trade License renewal fee tihsan hian sumdawngte chauh a nghawng lova, dawr bungraw man thlenga a san phah dawn avang leh a tuartu tur Mara ram mipuite tho an nih avangin mi harsa leh rethei zawk te ngaituah chung a hma la an ni tih an sawi bawk. Sumdawng inzawmkhawm pawl chuan Ram hmasawna atan Sumdawng ten Mawhphurhna lian tak an nei ve a hria in, chutiang kawnga hmasawn tur chuan kawng engkima thawhho hi an duh ber ani ti an sawi.

<><><>

## **ELECTION COMMISSION ON ASSEMBLY POLL**

Election Commission of India chuan September ni 18 atanga October ni 1 chhungin Haryana leh Jammu and Kashmir Assembly inthlan a buatsaih dawn. Jammu and Kashmir ah hian inthlan hi thawh thuma neih tur a ni a, Haryana ah hian thawh khata neih a ni thung ang. Inthlan-a vote tla te hi October ni 4 ah chhiar a ni ang.

Election Commission hian tunhnaiah Haryana leh Jammu & Kashmir te tlawhin inthlan atana an inpuahchahna an enho a. Supreme Court chuan September thla chhung ngeiin Jammu & Kashmir-ah inthlan hi buatsaih turin thu a lo pe tawh a. Haryana ah hian Assembly member 90 awmin November ni 3 ah an term a tawp dawn a ni.

Kuminah vek hian Maharastra leh Jharkhand-ah te Assembly inthlan a awm dawn bawk a. Maharastra ah hian sawrkar lai term hi November ni 26 ah a tawp dawn a. Jharkhand hi nakum January ni 5 ah a tawp ang.

<><><>

## **ISRO**

Indian Space Research Organisation (ISRO) chuan vawiinah khawvel hel tur satellite chu SSLV-D3 hmangin an kapchhuak. Sathish Dhawan Space Centre, Sriharikota atangin 175.5kg-a rit earth observation satellite e-08 hi kahchhuah a ni a. He satellite kahchhuah hi SSLV project hmawrbawkna tur niin hemi hnu hi chuan Indian Industry leh NewSpace India Ltd. ten an hmang thei dawn a ni..SSLV hi 500kg-a rit phur thei tura siam a ni.

<><><>

## **THAILAND**

Thailand Parliament chuan Prime Minister thar atan Paetongtam Shinawatra an thlang. Thailand hruaitu hlui Thaksin Shinawatra fanu Paetongtam Shinawatra hi kum 37 a upa niin an party Pheu Thai party ah mithar a ni a. Thailand Prime Minister naupang ber a ni dawn bawk a ni.

Thailand Prime Minister Srettha Thavisin ban anih hnu lawkah Paetongtam hi PM thar atan rawt a ni a. Srettha Thavisin hi Constitutional COurt chuan thamna lak tuma puhnaah dan phal loha a chet avangin thiamloh a cham tir a. Karhmasa khan he court vek hian nikum inthlanpuia thlan tlin sawrkar lai Move Forward Party chu thiat zui nghal a ni.

<><><>